

四庫全書

集部

欽定四庫全書

集部

息園存稿詩卷

一至四

詳校官監察御史臣龔驂文

中書臣劉源溥覆勘

總校官知縣臣楊懋珩

校對官主事臣張培

謄錄舉人臣吳壽朋

欽定四庫全書

息園存稿詩卷一

明 顧璘 撰

賦

述征賦

嘉靖元載天子冊皇后於中宮朝儀載闢坤德斯貞帝宗乃昌萬方胥慶臣璘列職東藩與觀察臣廷用祇奉懿典以朝京師際大禮之光榮欣斯役

之有適自慙謫陋敢效賡颺而躬逢盛典欣忭之
私有不能已於言者乃各作賦以攄義展懷焉若履
險樂平倦勤圖逸則衰臣之私衷故見諸卒章云爾
睠龍德之玄穆兮衍皇胤之蟬聯釋屏翰而履紫微兮
維義鈞而卜賢恢明烈以丕承兮踵遐軌於周宣赫於
變於既期兮暢聲靈乎八埏緬內則之正位兮亶王化
之斯由詠關雎之風始兮曰窈窕之好仇虞令德之不
易兮厘寤寐之殷憂覩天妹於魏墟兮協任姒之徽柔

仰乾坤之合德兮儲萬國之嘉福紹宗承於罔極兮溥
臣工之懽祝顧薄質之靡靡兮叨東藩之下牧修大禮
以奉職兮抑何憚於匍匐曰獻歲以揚舲兮遂歷覽乎
故吳慨餘艘之漂沒兮哂夫差之左圖櫓櫓挺于國門
兮哀莫返夫伍胥雖范蠡之遠害兮終貨殖於陶朱越
大江之天塹兮山崖嶮巖以中峙割南北以界分兮壯
地險而爭利吳蜀日尋於戈鋌兮五胡擾而未既苟厥
德之弗修兮胡金湯之足恃涉海陵與淮壖兮禹書固

卑厥壤觀今茲之庶富兮乃究夫地利之升降信戮力
而卒禽兮舒守道而出相夫既弗諶於文武兮茲西都
之日喪徐方撫撫其疆理兮引黃河之洪流王偃么而
興峙兮速周穆之見囚悲重瞳之暴戾兮冀裂鼎於鴻
溝天道錯輔于善人兮奚介心於恩讎邈泰山之不可
登兮指曲阜曰聖里儼金石之遺聲兮若洋洋其盈耳
將擔簦以裹糧兮從諸生以觀禮六藝殽亂而莫徵兮
願折衷於夫子歷平原之故郡兮弔尚書之精忠竝孤

城以扞河北兮回突騎於奔風遡易水以適燕兮壯士
噓氣兮猶成虹豈劍術之或疎兮悵雄圖之不終窮潞
渚而登塗兮肅四鸞之鏘鏘望閭闔以祗入兮靈宮轟
其雲翔鳴委佩以便旋兮綴鵷鷺之未行捧玉函以跼
進兮覲咫尺之龍光覲微忱之不足呈兮荷綸言之下
逮霑既醉之恩醕兮如湛露之汪濊瞻商邑之翼翼兮
森舊章之具在集咎夔以德輔兮頌天保於昭代亂曰
天清地醇兮範我形螭屈跼伏兮壯乃行馳騫道路兮

輟靡停老服斯役兮王化成兩䟽宦達兮去國城馬生
薄遊兮全令名造化嗇施兮誰與并舍動即靜兮庶娛
我生

楚頌亭賦

黃門史君從道種橘後園亭其中名曰楚頌上泝騷
人之懷下終蘇子之樂意亦廣矣南都顧璘乃揆而
賦之其辭曰

粵后土之磅礴兮遺偏美於東南衍澤壤之膏沃兮發

羣植之茂繁唯四氣有所私兮羌獨殺其隆寒日月交
以煦育兮雨露下以霑涵陽離宛其蒸蒸兮固物性之
所安有嘉木之秀出兮后皇名之曰橘既受性之芳馨
兮又秉志之專一乘青春以敷榮兮殆杪秋而成實爛
黃章以外文兮內實含乎精白森剌棘以穎利兮示剛
以為衛也不順遷而苟生兮寧從枳吾不悔也充包實
以致貢兮將以報吾所生也備五藥以利用兮匪自伐
以干名也唯嘉木之備此衆美兮固后祇之攸珍豐隆

庇其枝葉兮玄武守其靈根鳳皇下啄其靈兮麒麟擇
蔭而來馴苟非靈仙之與幽逸兮夫孰得而長新唯靈
均之抗行兮迺密契於南楚願寄情而申頌兮節交固
而心苦牽菌桂以儷美兮綴椒蘭以為伍植堯舜之明
廷兮藝夷齊之芳圃唯盛善之得善兮高名抗而不下
嗟末俗之賸賸兮徹醇醑而滴之登菰蒹而要蕭艾兮
桃李默而成蹊擯芳潔而好穢兮咸色豔之從嬉豈予
性之澹泊兮固知者之益希嗟海南之遷臣兮紹靈均

以自涓指陽羨而問舍兮既與予而成言慨美要之多
敗兮情耿耿而莫宣飄風逝而跡滅兮眇虛名之耳傳
曠宇宙之寥廓兮俟成敗之有期亦孰知靈均之同志
兮閱今茲而得之唯金淵之奧區兮實美人之所降靈
昭融以內辯兮外沈抑而憂章琢良瑁以充佩兮畏行
聲之遠揚研精義以正行兮蹈規武於先良鳳鳥之具
丈兮宣巖穴之曠藏排金扉而入瑤室兮思謬謬以展
忠也處雌伏而獨昂兮衆方惡其雄也豺虎跳梁於中

林兮取所憎以實爪牙鴈啣莽以高舉兮固知避乎網
羅望故鄉而遙征兮返初服以為華豈富貴之不可樂
兮視性命其孰多欲娛心而揚志兮信莫美于衆芳矧
嘉橘之異秀兮非百卉之能方汎洞庭以致之兮又南
踰乎荆湘萃嘉植而列樹兮紛蓊鬱而縱橫飾欄檻以
增觀兮日偃蹇乎林薄覽芳菲以永慰兮羌獨美其後
落心隱忍其有託兮宣時俗之所知世流徙以多變兮
又孰若茲芳之能祇掇遺實以三緘兮固將貽乎遠人

恐中道之多故兮又物微而招嗔思蹇產而內遏兮仰
曠闇而莫陳卒懷美以狷處兮用申娛於所珍重曰物
失時而無當兮吾既獲情於前修道不可以衆說兮姑
容與而獨游睇茲壤以託足兮又何吾生之足憂

宜祿堂賦

夫自棟宇以來至於輪奐之代堂觀之盛極矣宣輔
神明囿養德藝咸資厥用匪徒肆安云爾稽古春秋
賢哲之令式或闢堊表逸或樹槐兆興莫不事以號

彰地由人勝雖顯晦殊致其要同軌焉淮南朱先生
履道用賓三令鉅邑上德緩刑通昭休聞繼軫讀禮
之戚遂尚掛冠之志長子應登握蘭省局仲子應辰
給廩學官褒然競爽實豐鼎養迺有棲息之堂號曰
宜祿揆德考言厥旨懿哉大易曰積善之家必有余
慶雅頌之報德恒祈爵祿子孫之昌若斯堂者可謂
事紹前美名應典義者矣東吳顧璘竊辱游從之末
未展誦禱之願爰因誕慶乃遙賦焉賦曰

唯茲堂之閎啓迺明哲之攸居據吳楚之名會應斗牛
之奧區究瓊材以摠萃紛磊砢其相扶桂棟桷糾以揭
擎杏梁偃蹇而橫舒鬱穹窿以靜穆豁顯敞而通虛準
奢儉以合度咸協正於垂輪觀其面衢背市趨陽舍陰
風氣匝合日月代臨飛梁屹其相翼迴川繚以浹深居
鱗次以駢列實義里而儒林於外則有嘉樹交植叢篠
縈迴盤鬱冬檜敷披夏槐瑤藥當庭芍藥翻堦揚榮布
蔭異色同芳欄楯掩翳紆直迭見步櫺重迴物采殊變

周隅靡廣日不窮盼發志怡神居者忘倦其中則屏風
藻績聖壁含光刻方連絡玲瓏夜明簾薄重匝內不見
陽隆冬煦燠盛夏清涼備物有容分陳按方左圖右書
充溢兩廂亦有琴瑟間設于旁沉沉肅肅煜煜煌煌蓋
埃竭所不近而幽貞之宜藏者焉唯夫先生解組而居
之也釋喧囂之煩慮澹清虛之冲襟泝玄風於遠古騁
逸駕於來今悼湘纍之徒化慕柴桑之可欽惻行道之
多露寧閉門以陸沈於是歛塵容修靜理整員幘納方

履褒衣半結蘭佩雙委延蒙莊之隱流究老氏之玄旨
或彈琴以永歌或選辭而遐詣或據梧以坐忘或玩芳
以徙倚雖偃仰於一區固神游於萬里窮四序以愉樂
蓋不可以殫紀至若玄冬將半潛陽始萌霜融日出天
朗雲澄乃屆初度百體和平則有龐眉故老峩冠友生
威儀且閑三揖而升賓筵既秩壽尊徐行酌金莖之靈
液誦大雅之遺聲殆既醉以宴息覺神超而體輕于時
伯子馳函獻賦仲氏雍雍奉履于戶覩孫子之繩繩樂

兄弟之無故垂正則於有家蠲羣憂於內顧睇重楹以
舒顏履中庭而安步調醇氣以長存同斯堂而永固引
百祿乎蟪延庶嘉名之無負

送遠賦贈陳侍御琳赴謫所

出國門之莽蒼兮渺長路之悠悠泝江潭以遙征兮將
從役乎炎洲伐菌桂以為櫟兮剗貞松而為舟驅湘漁
以方之兮要尼父與之同浮獲予心之所安兮雖顛隳
其何悔苟調劑之中製兮啖荼堇以為美緬修名之有

則兮非矯飾之可希指九皇以矢心兮百神下而察之
冀皇路之無頗兮何顧乎予之中私遺綿力以它效兮
奚芥蒂于崇卑嗟青春之凝迈兮屬戒行而淫雨風披
離而慄怒兮雲觸石而游宇潢潦滉瀢以彌望兮泥淖
縱橫而淤沮心一日而九馳兮車欲發而齟齬友生瞻
望而野泣兮漉桂醕而留連青衿遮道而攀轅兮足頓
地而呼天懷德義之滲漉兮固去而不能舍也蘭蕙遠
而逾馨兮豈惜夫知者之寡也鳳皇跼乎丹邱兮餘音

嘹唳而振八極賢哲耿介而抗行兮四海尚其明式衆
增美而侈美兮予獨潛悲而於邑俾余躬之昭昭兮寧
均戴乎白日亂曰桂棹夷猶越南荒兮瀄瀄江流經舊
邦兮登甘獻醇承北堂兮善以為寶樂何央兮挾幽展
屈惠彼方兮皇鑒其昭道將昌兮鴻名駿烈允無疆兮

雪村賦

彭城之野有高士焉隱居衡門履道抱藝厥聲四聞乃
有名達之流款焉過存載瞻其廬榜曰雪村冬官大夫

嘆曰子誠吾徒也夫人孰不知春林之娛也陽氣奮盈
華葉紛敷條風煦日煖人體膚蕩心冶游挈榼提壺樂
而忘歸與時俱徂子不慕此其志誠殊豈不謂夫朔風
且陰上天雨雪飛璫積瑤高下同白雲龍削素呂梁冰
立郊居閒寂車馬斷絕古木既僵修竹綠色凍鹿饑鳥
來就人食子於是時擁爐支膝稚子舉觴老妻行炙哦
詩寫圖逮夜未息俛仰古人宛其在席旁視俗子天壤
懸隔高士唯唯未出言說觀化老人進曰淺哉大夫之

言豈足論于高明者哉夫雪以至潔為體善化為靈弗累于物乃全其清高士之居彭城也抗志霞表善鑒物情稽偃王之委國厭羶德之喪精撫甦生之石槨悟朽骨之無成劉項之跡溘焉泯矣何異乎觸蠻氏之爭矧蕭曹之與絳灌誠附驥尾而效蒼蠅是以韞玉圖史之林脫屣王侯之廷雪哉雪哉固將從其變化豈徒效其清冷邪高士颯然而笑愕然而驚非有惠子孰知莊生於是虛白先生抗肘而上曰高士之志受抑於大夫故

快心於老人抑猶未也願撤藩籬以揚道真唯天多恩
何貴霜雪歛於不用乃歸藏之澤唯地多方何貴邨野
處于不爭乃順受之所多恩多方厥道乃張不用不爭
厥道乃凝可以養德可以養生庶曰皓首觀子于成高
士再拜再謝然後二子豁然自釋咸知雪村之所由名
鳴蛙賦

嗟余病之眩瞶聞虛館而澄神何汙池之湫隘聚羣蛙
以為鄰遭暑雨之淫淈鳴聲沸其聒人增予懷之煩贅

竟長夜而達晨嘗觀夫蛙之為狀也蠕動沮澤化始科
斗匪鱗匪介形質甚陋修脰何趨怒目何詬囊氣于腹
鼓聲于口呱呱閣閣不中音奏羣喧衆噪不辯誰某幽
人掩耳羈旅疾首矧予卧病無所避走將垂餌以斃之
又不足以克君豆少焉陰曠既澄皎日初出鳥鳴嚶嚶
蛙聲盡息予乃策杖臨水倚嘉木而嘆曰吁嗟萬物隨
氣陶鎔音量異度莫可齊同乾鵲何吉鵠梟何凶鳴鴈
何拙鸚鵡何工故唐虞受禪舜禹雍和湯武放伐伊呂

攫拏七雄虎闢頗牧橫戈稷下濫說百氏誼譁大化幹
以軒輊雖天地其奈何星何塞而滅景雷何侈而轟車
彼衆籟之噉嘯一唯噫氣之所加萬化誠莫逃於天倪
吾又何怪乎鳴蛙

誚沙燕賦

河朔之野川厓壁起有鳥曰沙燕穴居穀化以陋見
全厥類日夥人舟過驚則飛噪憑怒余與八厓子惡
其驕也並作賦誚焉

嗤彼沙燕翔翔川湄不巢而穴託體何卑族類冗瑣毛羽離褊大不盈握弱靡自持象恣王釵棲惴華棖祥乖玄卯貴失烏衣堞塊董戶鼠壤資饑朗日弗照清風鮮吹童稚攸害蹂躪橫施莫假矧矧乎罔置嗚呼是淫譟而雜處惡濕而居下者邪是獺以為魚鳶以為鼠者邪是泥啄而風舉者邪是旅獐羊以為厲藪者邪羽不飾旌旄肉不登鼎俎狡伏而惡寒躁動而附暑譬之人倫穿窬是伍請付之鬻釜

息園存稿詩卷一

欽定四庫全書

息園存稿詩卷二

明 顧璘 撰

樂府雜詩

將進酒

今日何日景媚辰良嘉客四五雜坐高堂主人羅廣宴
炮炙炙肥羊金壺注清酒放歌笑千場安能坐愁鬱徒
使鬚髮蒼君不見阿房崢嶸高入天楚兵入關三月煙

又不見柞宮桂館通滄海茂陵孤墳竟何在不如劉伯
倫杯行到手不肯停天地且以為席幕睨視貴介如螟
蛉今日樂相樂急管交繁絲清歌聲宛轉華燭光參差
對酒不痛飲孤負天桃枝拔劍自起舞向君肝膽披黃金
去還來國士難與期男兒墮地抱意氣何用碌碌錢刀為
扶風豪士歌

蛟龍一勺水四海觀滂沱舉頭笑鳳皇空鳴岐山阿扶
風賢士昂藏身中隱磊落之經綸時來仗策謁明主襟

期直與夔龍親世事悠悠不自保反覆浮雲變昏曉丈
夫有志不得伸抱關老却夷門道君不見長沙賈傅稱
少年口吐禮樂翻雲煙堂中絳灌一側目枉殺吳公推
轂賢又不見漢家舊日李將軍百戰孤軍陷塞垣可憐
獄吏搖空筆遂令妻子俱煩冤焚却頭上冠且製笑容
衣君看避矰鴈直入青冥飛魯連竟蹈東海水夷齊獨
采西山薇生乏功名映麟閣何用失路長依依對君解
却腰間劍歸覓磻溪舊釣磯

傷歌行

青春欲去不可留
白日欲落花含愁
銀鞍白馬分明別
故苑夫容傷素秋
不惜紅顏坐凋歇
可憐君恩難再得
夜簾香銷巫峽雲
寒衣淚落秦關雪
掩却青銅鏡不忍
生塵埃且留蘭膏燭
有心莫成灰
風吹蓬枝往復回去
年團扇今年開
小物無情尚如此
何獨君恩無去來
買賦無黃金挑絲不成錦
欲因魂夢逐車輪
願君莫惡珊瑚枕

春日行

漢家三十六離宮桃花樹樹搖春風武皇當年正好武
天馬七尺如飛龍清晨踟躕過新市薄暮鳴鞘入禁中
中人盡戴鷩鷩冠猛士半跨黃金鞍彎弓向雲仰射鴈
一發兩禽皆道難大官賜酒碑礪甌一春擊盡千肥牛
撞鐘伐鼓獻奇舞燈前變幻魚龍浮宮門沉沉金鑰收
明月挂在城西樓東方漸高復來遊

羽林郎

胡姬酒家女年紀十五強白日自當壚肌膚雪色光兩
鬟垂過耳美目汎清揚窈窕衣紈素珍珠綴香囊盈盈
曳絲履紅羅雙鴛鴦自持耿介性不解閨中藏使君且
莫近况復羽林郎自有蒲莞席何用黃金牀自有清樽
酒何必玉壺漿富貴徒旦夕禮義古所防作女苟無體
不如犬與羊寄謝道上露慎勿霑我裳

登高丘而望遠海

登高而望遠不見天地端日月互上下東西如跳丸長

風自何起瀛海翻波瀾六鰲正抃舞五岳無時安恍惚
青天中仙人跨飛鸞邀我謁帝室金門樽盤桓青龍對
人怒玉女傾笑歡彷徨返故路北斗方闌干坐地仰天
歎三日不能食

東門行

出東門拔劒擊門關惜它人駕駟馬富貴遨遊王侯卿
相間嗟我獨何鬱鬱中夜憂晨食生不得五鼎食死當
長逝不願還少婦牽衣悲啼聽妾致一言舜禹疾走以

避位謳歌頌其賢黃頭權郎鑄山而餓死卒不得懷一
錢伯夷食薇蕨盜跖乃炙人肝惡來高位紂殺比干萬
族各各有生命上懸滄浪之天富貴與貧賤自計誠獨
難

怨歌行

白日何皎皎浮雲變重陰忠義雖云烈讒巧間君心子
椒毀屈平宰嚭惡子胥懷沙沈湘浦鴟夷棄五湖大義
貫金石何能顧微軀居高忽下議卒受傍人愚楚王終

俘虜吳國竟丘墟杳杳九泉暮啣恨當何如我欲竟此
曲此曲傷君神往者勿復道寄謝後代人

公無渡河

願公渡滄海不願公渡河海水有定性河水多迴波金
隄失上策瓠子遺悲歌山陵且震蕩將柰公身何白骨
葬黃流化為黿與鼉不信妾言苦請觀龍門津自古斷
舟楫公今徒殺身殺身亦不易竟使傍人嗤妾言公不
聽公心妾不知箜篌之曲令人悲

善哉行

前有江水東注其流日月出沒直與年讎高車駟馬其
憂孔多握金而泣孰與行歌夷齊抗首枵腹泉下伯陽
和光均謂賢者焦焦膾鯁速我親交以何解憂唯有遊
遨遊遨四方金門玉堂不如羸馬蹶躅故鄉

獨漉篇

獨漉獨漉水多泥滑泥滑道阻傷我車轂持膏作燭將
以照夜虛花掩光不逮槃下猛虎在山百獸畏威陷穽

三日垂首訴饑鐵生礦中入冶為器劒負威神錘則委
地男兒生身萬事網紀突梯無施不如女子

長歌行

神龍躍溟海天地生雲雷猛虎嘯深谷大風山木摧靈
物固有象烈士自有懷經綸萬物理上與聖哲偕三光
鑒丹府百神司形骸舉手奠山嶽揮霍雲霧開功成不
受賞長揖歸草萊嗤彼鼎彝業瑣瑣何為哉

獨不見

憶妾嫁君日雲髮未成鬟飄搖紅羅帶窈窕秦珠環薰
香閉綺閣對坐春風閒許妾心不移長指門前山詎意
青樓女巧笑矜朱顏春風忽飄轉一往不可還君如雲
間月舉手杳莫攀妾如歸海水日夜空潺湲

秦女卷衣

拂拭君王衣宛轉五龍文光華動寶席恐是瑤臺靈賈
人金屏側天語杳莫聞願持小星義誓以奉朝暉

上之回

回中道何逶迤千乘霧列萬騎雲馳北厯蕭關戍東謁汾陰祠金幣四方至牛馬盡為犧君王勞玉體侍從敢言疲

戰城南

嚴秋朔氣至敵騎寇邊城軍符星流急中夜起徵兵魚麗按圖列龍韜應機呈前軍白刃交格鬪聲鏖鉦控弦若滿月飛鏑競先鳴流血原草赤填尸坑谷平洗兵下隴水獻捷奏承明天威赫神武戎狄震且驚孰知折衝

略乃由一書生伐謀貴廟算匪在多戰爭

塞下曲

千里驂騑丈八矛男兒畫地取封侯
黃昏塞上傳烽火
一夜吹笳坐戍樓

百戰摧胡未許強馬前生縛左賢王
麟符鵲印須臾事
只博凌烟字一行

黃河水厚馬橫行朔氣稜稜古鐵明
恨殺夜來風雪緊
匈奴逃出受降城

破產潛收古湛盧
願馳西域斬休屠
十年未拜千夫長
聊試邊城牧馬奴

古壯士歌

山西壯士何才雄
虬鬚燕頤生英風
青春挾槩三邊外
白晝探丸九市中
一身列侍麒麟殿
跨出龍駒萬人羨
狐腋朝裁趙客裘
鵝膏夜淬吳王劍
生年十五事橫行
肯學操觚記姓名
當衢賈勇萬乘避
臨危重義一身輕
田文鷄狗真餘子
有足不曳春申履
眼前國士稍傾心

慷慨橋陰為君死

長相思曲

長相思在何處吳岫雲深隔江樹江樹臨春花正榮人
今已向天涯去瑤樓綉戶橫蘭烟中有綠鬟金骨仙星
河隱約秋期杳坐捲朱簾望月圓

明妃怨

掩抑哀絃別上都玉顏那遣嫁匈奴人生覲面猶相忽
何況君王隔畫圖

翠娥顰雪度龍沙欲悔還愁却自嗟爭似後宮無履蹟
此生長擬見中華

白苧辭

玉房園永夏氣清黃金作柱橫鳴箏風紈霧縠麗且輕
君王近前嬌不迎牽儔顧侶若有情情有餘言不足團
扇掩唇揚妙曲五花繡茵坐相促

春江詞

往苒際韶景纏綿結芳情蕩舟清江曲雲物麗波明夾

欽定四庫全書

息園存稿詩
卷二

九

岸花齊發間渚草新生嘒嘒游魚散差池飛燕輕名都
勝侶集終宴衆歡并衣香襲芳芷酒影含飛英陳詞擬
吳趨選樂雜秦聲詎羨鏡湖隱匪矜龍池榮樂莫斯會
樂白日且徐傾

懊惱曲效齊梁體

小時聞長沙說在天盡處人言見郎船已過長沙去
家鷄各有時海燕各有窠郎家撲天屋作底愛風波
玉刻蓮花竿碧酒湛若空與郎雙杯送出門耐霜風

春風上燕京秋風下湘渚黃鵠有六翮定自不及汝

粵南曲

白豕兮黃羊竹挺挺兮莖方顧異物兮心潛傷我何為
兮客殊方北風吹衣兮思故鄉

夜雨嘆

朔風吹雨西北來南山晝晦夜不開寒聲悲淒雜霰落
暮色黯慘兼雲回仰窺箕斗不辨影俯眺八極彌黃埃
羣鷄啁啾登樹語城角斷續餘音哀此時野人正愁鬱

欽定四庫全書

息園存稿詩
卷二

十

短漏頗柰銅龍催殘燈微明鼠上下兀坐自畫爐中灰
北漠羣胡踐邊壘西江狂賊生禍胎主上動色念溝壑
何況司馬諸行臺長星流天火墮地熒惑擾紀何為哉
去年三吳遭赤旱萬戶鬻子無遺孩今年州司索官帑
肉瘠不抹瘡瘵災空田蒼茫飛鳥盡野水震蕩驚鱗推
備民誰繼子產智足國正望夷吾才龍鳴劍匣壯士老
黃金臺古空崔嵬海內故人掩關坐尺書累歲誰為裁
陽春何時動羣蟄九域浩蕩揚風雷江河倒洗皇路淨

臺省洞達無嫌猜花明草媚日杲杲男耕女織天恢恢
野人多病有歸處養鷄牧豕王城隈

霖雨歌

有叙

聖皇御天大厯踰紀明德布昭利氣攸洽木饑水毀
之災絕書史氏邇者驕陽厄於南國麥不入土汲井
見鮒爰有股肱元僚暨諸承事齋裡露禱蜚蠊潛達
玄雲宵興解澤下施欣欣然咸嘉天人之符也猷畝
末臣守痼蓬室譬諸草木咸荷生遂於是按義作歌

諧諸巷頌若曰協以宮徵承之宗廟豈不悖謬乎歌

曰

乾樞尊坤極靜人之靈感斯應於皇德歆帝心愍下土
施甘露霖之絕土膏歆物以殘民益懾霖之來天睠回
物既蘇民乃懷霖之沛汪且濺海靈翔潢澤潰霖之足
靈爽伏沃八埏蕃百穀人已悅神益和精裡舉戩福多
昉天邑流海宇國祚隆永無圯

其一凡三十二句句三字

赫赫皇邑戢戢王基亢陽肆烈下民其咨天子有德百僚師師奏假且嚴受於神祇霖雨既降百物咸熙鞠哉之詠媲美周詩

其二凡十二句句四字

帝里驕陽三月外神車靈雨萬家中為懽解澤周窮壤共喜皇情達上穹

其三凡四句句七字

東隅氣舉屏翳乘風奔龍騰鯨掉橫飛厲天門玄澤滂

沱飛湍激崑崙如繩如麻下注廣且繁

其四凡八句四句句四字四句句五字

玉宇垂玄液瑤圖紀上祥堯雲方蒼蔚舜海轉汪洋氣
合晨樓暗聲兼夕漏長桑林奚用禱明德邁前王

其五凡八句句五字

帝載協天應王仁同化游冬原偃赤魃春畝茁來薶汎
舟川可濟濡綆井堪汲元功布黔黎休徵順皇極

其六凡八句句五字

招靈師兮海之滸來無從兮去無所溥神功兮被下土
四民阜兮永安堵

其七凡四句句七字

武皇南巡舊京歌

紫蓋黃旗擁六軍金陵王氣日氤氲龍君涉海移三島
鳳女排空結五雲

北固江濤控海門南都山勢疊崑崙金宮暫啓雙龍見
玉帳遙臨萬馬屯

狂鯨吹霧暗江潭聖主仁恩似海涵聊唱大風過泗上
即飛霖雨洗淮南

綠水朱樓佳麗城君王行處彩雲生烟花一望三千里
遙送春風入鎬京

趙國新裁短後服漢王遙嗔側注冠且揮神劍清方嶽
莫著褒衣聚將壇

千年寶厯自南開八葉神孫暫北來日月更臨龍虎阜
雲霞重抱鳳凰臺

朝閃龍旂入建康暮收飛檄定吳疆會稽勒石羞秦帝
滄海歌雲笑穆王

青龍山北接飛猱白鷺洲東射海鰲不為芳春浪行幸
寢園聊待薦含桃

金陵千古帝王州高廟衣冠月出游傳語三邊貔虎士
莫須喧近鳳凰樓

舊都何讓古新豐父老稱觴拜舞同金馬詞臣休候直
獨宣京兆問民風

射虎南山黑霧摧
斬鯨東海白波迴
吾皇一出清天下
宣為揚州花月來

白髮梨園老樂師
錦綃花帽對彈絲
行宮只奏中和調
解厭南朝玉樹詞

石壁斜臨玄武湖
中開天府貯民圖
文魚在藻承皇澤
來傍龍舟夜吐珠

幕府山根江接天
昭明樓下月橫烟
六韜自可銷長夏
不蕩蘭舟唱采蓮

朱雀橋連翠柳衢銀鞍絲鞚錦模糊君王行樂千人出
遙認飛龍天馬駒

六代繁華何足誇而今四海共為家暫看吳苑環城水
終憶燕臺夾路花

燕京地圖天下吭乾樞高運整羣方南巡淨掃風烟色
北上長懸日月光

張侍御平海凱歌

將軍受脤廟謨同御史臨戎使節雄早向海濱銷白刃

却歸天上拜彤弓

繡服南行草樹榮樓船南下海波平
儒生舊負勤王略天子新聞破虜名

閭門晴日射金戈馬上常麾白羽過
貔虎曉屯雲作陣鯨鯢夜斬血成波

南郡冰霜肅憲威東吳山水拱皇畿
青春冉冉江花發白日遲遲海燕飛

宮中詞

太液紅雲重昭陽素月斜
龍香浮蕙草鳳輦過桃花
翠扇搖歌席銀屏隱卧車
雙雙紫鸞羽飛上玉皇家

複道通瀛海周垣隱洞天
雲隨珠珮女霞覆羽衣僊
秀豔踈丹粉潛悲咽管絃
春光閒永巷愁坐惜流年

詔省長楊獵虞人夜啓關
霜鷹騰紫籞天馬躍朱閑
寶劒秋蓮色凋弓朔月彎
非熊誰協兆看載後車還

綺閣延朱夏花陰晝漏長
研砂養蜥蜴刺繡學鴛鴦
細字中官扇奇熏外國香
午窻蘭玉夢驚起謝君王

擬宮怨

水殿夫容隱暗霜
夜臨新月自焚香
窻間畫扇含秋思
帳裏華燈隔御光
四壁椒塗花靄散
六宮蓮漏水聲長
君恩未必緣歌舞
無那昭陽掌上狂

紫殿繁華夢已沉
掖庭苔色晚陰陰
浮雲變態隨君意
朗月流輝鑒妾心
屈戌橫門金鎖冷
轆轤牽井玉瓶深
空將錦瑟傳哀怨
寂寞誰聽空外音

翠靨金蟬入帝家
擬將新寵屬鉛華
君王自信圖中貌

靜女虛迎夢裏車
帳殿秋陰生角枕
屨廊空響應琵琶
含情獨倚朱闌暮
滿院微風動落花

漢皇宮殿月明時
魯侍宸游百子池
舞馬登牀春進酒
盤龍啣燭夜觀碁
御前卻輦言無忌
衆裏當熊死不辭
舊恨飄零同落葉
春風空遠萬年枝

咫尺長門萬里遙
恥將褰綬曳纖腰
盈盈壁月沉鸞鏡
渺渺銀河斷鵲橋
上苑旌旗迴夜獵
建章鐘鼓散晨朝
此身不及雙栖鳳
處處隨君聽九韶

流蘇帳冷璫窻虛雲月差差度玉除百歲精靈悲故劍
九重恩寵附前魚蓮花有恨凝芳履竹葉無光引屬車
人意已踈言更淺莫將詞賦倚相如

不見彤墀日月旂庭隅草木掩清輝金輿到處無新故
玉貌從來有是非暮雨樓臺雙燕入春寒池館百花稀
監宮一去無人語獨自含顰詠綠衣

擬夏日宮中行樂詞

紫霄不與下方同秋爽常迴六月中風羽對搖雲母榻

水池全浸水晶宮

玉面朱唇映月明
影娥池畔繞花行
夫容不耐凋殘色
祇恐新涼一夜生

霧縠雲綃細欲無
倚風臨水弱須扶
玉魚療渴辭盤露
紈扇傷秋對井梧

天子宮中調五絃
南薰新曲萬方傳
嚮離一一遵堯典
解愠人人頌舜年

九成臺殿碧山陞
雲霧寒交玉樹枝
金輿歸晚宵鐘徹

和就岐王避暑詩

唧唧曲慰友喪女

唧唧復唧唧問君何所憶生女長不成門楣待誰立
容色比桃花持將結貴家東風不作惡作底委泥沙
拜月甫離懷咏雪可憐才鵝雛墮逝水一去難重迴
阿爺仰天號阿母跼地哭不忍昇黃土脉脉蓋汝骨

採樵歌效竹枝體

萬嶺千山春日晴女郎逐伴采樵行歌中暗恨無人識

惟聽雲邊嫋娜聲

利斧樵山得大枝良媒結好有佳期十八女兒空谷裏
玉面花顏誰得知

儂家兄弟舌翻瀾百丈清潭一瀉乾深山黑夜獨歸去
肯信儂心鐵石般

阿母朝饑待早糜還家常怪得薪遲快刀留惜不將用
空手攀枝那得施

松柏留栽作棟梁安排桃李引春光荒榛亂棘唯須剪

金匱要略卷二
刺手鉤衣不易量

腰鎌空出負薪還上嶺身輕下嶺艱東方黑雲將雨至
培塿險過太行山

近林蕭條無可薪遠山猛虎嚙生人寄言城市游盤子
何地生涯不苦辛

息園存稿詩卷二

欽定四庫全書

息園存稿詩卷三

明 顧璘 撰

五言古詩

擬古十一首

四方多岐路出門難與期遊子適萬里三歲間音徽不
惜離別苦但恐中心乖人情非山嶽感物易遷移釋我
金跳脫絨書寄君側願視故人心勿視新人色

高樓臨大路中有傾城姝天天若桃李的的如明珠款
款理機杼洋洋誦詩書蕩子久從征歲歲空牀居借問
女何名云是古羅敷

日月經天流四時相代序青青園中草奄忽殞霜露富
貴始為娛死者恒不具陽春扇萬物倉庚振其羽翩翩
春羅裳冶遊經鄴杜郊圻多睽親速我諸舅父華樽芬
狄香烹魚割肥羜繾綣歌王風靈鍾間鼉鼓為樂貴及
時多憂徒自苦

良時置高會四座羅嘉賓
珮玉雍雍至天子解威神
羽爵交上下犧尊絡繹陳
主垂彤弓惠賓沐湛露仁
工歌贊令德何忌讒諛人
感激千載會爽然傾一身
豈無父母恩王國如至親

高樓在何所乃在驪山隈
復道通天行華旗揭軒堦
趙女理長瑟朱絃一何哀
流響入青雲飛鳥盡低迴
顧瞻邯鄲道白露霑蒿萊
昔日繁華處但聞狼與豺
安得周周羽銜爾棲叢臺

涉江采芳桂日暮且徒還豈無歲華色所往固迷端人
生多憂患白露凋朱顏盛年失道路皓首空長嘆

烈風吹西園繁霜中夜落彼美三春花顏色盡銷鑠
蜺蜺潛空野潦水息大壑鷹隼厲羽飛商氣日以廓
古人重交歡大義良不薄臨命沉黃壚永不負然諾
野鳥多采章檀園亦生籜貴盛非云美貧賤詎云惡
瓶罌各有量貴子善斟酌

河洲雙鴛鴦比翼乘春飛嘉禽非好合天道有雄雌
賤

妾充君室婉嬈希光儀十載絕音耗六禮靡時施容華
豈不惜禮義焉可虧嗷嗷鳴鴈翔悠悠感我思

青青山上松下有千載苓采之遺君子願以延遐齡人
賤物亦鄙陋質難為呈棄捐勿復道嘆息此微誠

昊天何皎皎列宿舒榮光經緯備萬象乃是太陽英精
爽一相失殞落隨塵揚文豹澤以霧神龍俟雲翔物理
資化遷誰能越其方玄機苟不會百爾慎所將

桃李生東園開花條垂實狂風動地起榮落間欣戚人

生苦多故通塞會所值百年復幾時玄髮忽已白嘉會
苟參差呂望老漁澤時乘風雲會木石生羽翮所貴崇
令名高爵非所恤

勗志二首貽沐君

貧賤憂不足富貴思有餘刀錐競蠅虻憤鬱諒何舒彼
美函關叟冉冉驅牛車賢哉顏氏子簞瓢恒晏如沐侯
本雄達紉綺夙所居戰勝願為勇道積生膏腴邁心絕
浮豔遊目閱冥虛俟彼天光發永以謝昏衢

大易重居豫如石乃稱良五子憂國亂興歌戒淫荒富
盛難為居德薄固生殃桓桓簪纓裔秉麾鎮南疆朱門
迥且深列鼎坐華堂況乃寶玉窟四海矜茲鄉願言砥
清操為國揚休光先民四知訓懷哉安可忘

贈別劉元瑞因懷都下諸君子六首

矯矯雙飛龍蟠彼洪川揚歛乘風雲會羽翼周天翔與
子生南國夔角兩顛昂弱冠改初服謁帝升金堂聯翩
就下列蒞佩史蘭襍皎潔中懷曲持以比珪璋

帝城何巍巍九門十二衢飛觀凌雲表王侯夾巷居
人盛馳逐白日恣驩娛流塵汎高蓋輕風振華裾索居
寡儔侶曠志眇相疎低心弄柔翰散帙覽賢書永諧金
石交此樂良已紓

枹矢戀急弦大義難久安飄飄遊宦子岐路多離歎雙
鵠遊河汜飛鳴樂且閑風波一乖別悵望傷心顏顏傷
有時憚心傷何亡寬迢迢滯西北默默限東南無舟濟
江海會面誠獨難

巖風切肌骨大壑層氷堅百草悴中野繁霜下青天念
子涉長道過家遡以綿孝義隆所願匪以親交然清晨
策駑馬攜手此河壩上問王國事下以叙鄉園信宿不
能寐宛轉展離言

置酒東城曲廣讌羅衆賓玉樽湛清醕鱸鯉辦廚珍獻
酬一以瀆見子各諧親既來不旬日又不履城闔道遠
別日促百念未及伸哀歌激齊瑟慷慨傷心神

民生信多故天道廣且慈白日燭下土迴光徹幽微秉

節歷皇甸四牡駢以馳孟春陽氣應萬物發華滋周行
布嘉會緩獄憲天施先民有遺軌慎刑釋其疑鄙哉夸
毗子察察於淵魚

送程通參歸黔陽展墓

楚水不可極東南煙浪深孤舟日千里渺渺浮鄉心清
世逢孝理賜歸展邱林風木九原淚蘋蘩二南音黔陽
八月交霜露增蕭森烏哺就衰草獺祭臨寒渚時物各
生態周覽傷中襟義範式閭井薄俗歸所欽嗤彼季子

歸獨謂多黃金

梧竹亭雅集

得樹字

朱明啟初節朝日麗芳圃清風起蘋末高林泣零露嘉
梧既繁蔚修竹亦交互浩浩清淮流交交鳥音度真賞
方在茲豈謂春物暮達士守閑寂塵鞅寡所務高堂良
宴會斗酒集親故魚羔間蒸豢膾鯉炙麕脯酬酢展光
儀情親見童孺既醉無庸歸涂翰極懽趣蘭亭綠竹
金谷盛文賦匪矜千秋名聊以慰良晤顧慙蒹葭姿何

能倚瑤樹

送儲司徒入京三首

紫微耀中天列宿馳清輝
巍巍四門闢羣賢歛來儀
明公秉淳懿皎皎金玉姿
北起既鳳翥南遷亦鵬飛
止水鑑羣類凝霜肅臺威
抗志秋漢迥振藻春林菲
於今迺獨秀視古允同徽

煌煌整嚴駕肅肅赴明召
矯迹登中臺於茲輔邦教
九賦正王度六禮率先道
防淫廣同風訓物釋異好
小人

思惠澤君子仰華照願言王國楨永為神所勞

瞻彼冶城曲風物何融明嘉樹參差發谷鳥下上鳴理
棹及茲逝踟躕鬱離情列筵總髦士陳詩並朝英眷眷
依蘭思欣欣拔茅榮嗟予抱陋質亦得奉休聲雖蒙畧
年義投報愧身輕

試院獨坐感懷

決旬限清禁勞形理賢羅南簷白日影入室漸已多輕
葛不可御秋風振庭柯蹇予寡籌策五馬臨大河仰懷

保釐憂俯慙來暮歌生身匪金石歲月猶驚波悠悠閱
晨夕鬱鬱將奈何

費少傅書樓

高樓渺何許宛在橫林深龍溪既縈帶珠峯亦前臨先
公植嘉樹蒼蔚敷重陰神靈蘊從昔天造開方今太傅
卧東山雄構結叢森寶書數千卷縹囊疊璆琳探玄閱
道論墜緒窮幽尋管樂莽荆棘伊傅漫為霖害馬苦捶
策朱絃間希音曠然華胥遊獨契黃虞心杲日鑒緹幕

清風蕩絺襟烟光澤幽卉氣序喧鳴禽傾杯稍醺洽覽
物自謳吟不復知有我此樂當誰任

玉輝堂成有作

朔風吹日夜雪霰正飛揚太陰天氣肅積素明瑤光蔓
草總蕪沒青松鬱蒼蒼騁馳臨憤峯閭閻皓迷茫興懷
屬凍餒悲歌慨以慷被褐者誰子英英登我堂鄭君閩
南彥應黃秀茲鄉宛彼三白鳳矯首雲中翔聿瞻璫璵
色載攄追琢章玄言極太始雅意遺巖廊俯論九州事

浩氣不可量清輝被棟宇隱隱回晶芒枯槁籍華澤忻
如兆農祥勝事宜昭垂嘉名允相將願言誓貞白千載
傳芬芳

董子祠

周道昔云季王風蕩無章宣尼輯麟史誅賞慎天常秦
灰詎終泯漢教方再昌夫子隱龍德下帷正迷方發憤
綴道論述聖冀升堂統真建禮樂稽疑質灾祥斗酒礙
吞舟魚目妬夜光迢迢江都相鬱鬱東南行王澤永凋

歇明畧不獲張作賦悼遲暮空文竟誰償蹇予緬遐代
祇役邁維揚弭棹訊幽逸憑軾仰堂隍朱軒覆重城瓊
樓妥靈相禮崇祀彌肅跡往德愈芳懷賢軫遙眷悠悠
聖謨長雲龍古難際惻惋令神傷

漂母祠

步自城西門古祠蔽荒垣借問道傍子云是漂母魂慨
昔逐鹿代英俊殫邱樊桓桓淮陰侯韜鈴富心源龍蟄
厄叢蟻豹隱翳霾昏少年恣凌侮列卒同趨奔范睢身

屢辱張儀舌徒存流離伏河涘狼籍蒙壺殮草具固云
鮮居窮易為恩獻塊獲晉賞羹頡列漢藩矧茲賢姬惠
興哀逮王孫既啟萬戶封竟殘千金言

答謝生

夫六籍攸始標道立經游夏以還摘章宣義古今
殊致可畧而觀然朴質鮮青黃之飾華滋乖情性
之源揆之文質咸乖厥宜故達藝者折衷於屈馬
蹈軌於曹劉斯云至矣俗學滋弊雅音響絕晚

遇吾子振頽沃凋抑以二董漢始雙韓唐季者乎
奇之羨之曷其有極適荷大篇見投濯塵刊腐敷
其精英可謂沉重淵而出玄珠剖荆璞而呈夜璧
斯世斯才誠不易得所稱賤子云云心實慙之不敢
引謝久游吏局少業悉荒兼迫衰途藻思日蹙無以
承麗澤之惠聊述鄙辭用攄愛助幸吾子教之而
已

楚南有奇士毓秀自荆衡氣涵百川潤才苞羣彙英操

觚涉詞苑仰蹈作者程璘瑤蘊玉藻翫沓騰金聲落羽
詎云失登龍咸爾榮遇我齊魯郊瀉心類平生繼枉瓊
瑤作侈價溢連城大雅喪久矣顧茲心震驚矧聞偉麗
士矜氣靡和平具美鮮疵德羣彥嘉令名吾衰伏巖壑
願爾充國楨

張處士園葵

逸士逃江海息影卧邱園育物時嘉植冥心觀化原百
卉各爾媚乃睠傾陽根丹葩耀朱夏翠莖承露繁衛足

智以周凌寒道彌存衆美既有合貞性固宜敦撰德擬
松栢襲芳偕蘭蓀永懷慎勿伐玄契渺忘言

上職方叔父封君壽詩

葛仙隱方厓陶公棲曲林邦圻聚靈藪往哲寄幽尋李
父慕嘉遯卜築東山岑丹榆夾門徑平疇間清潯勞形
理耕織曠望悅高深親交集近局濁酒時共斟豈必綠
與竹俯聆清澗音機心一以息宴坐但冲襟醇和會玄理
愷悌契神心渥顏永無改萬壽樂且湛愛子解組歸娛

彩蘭堂陰列鼎力豈逮苦節播休音簞瓢進菽水俯仰
展歡忱內盛匪外備物理徵在今

東郊田園四首

璘本江東腐儒無廊廟之骨從宦三十年獲落下
就謝歸來遂與野人相親養雞牧豕能任蓑笠
擊缶醉歌禮法俱廢或肅容對客如猱狙御衣
冠隨即褫去聞談官政如爰居聽鍾鼓目掉心眩
乃知情質烟霞不可以強變也新營田園輒賦此

篇

陶公歸桑里謝客營石門於世既無競努力事田園春
還理荒穢良苗應時繁豈不念歲豐天道難預論列槿
藩草屋藝蔬備晨飧郊居漸成趣益厭城市喧菽水苟
無闕萬事奚足言

出門見青山幽意日瀟灑修竹遶舍東流水在田下衣
冠不須着犁鋤亦時把日與山翁游禮貌樂疎野風俗
重時令相邀作鄉社濁醪滿浮蟻蛙魚剖新鮓交酬各

酩酊至樂絕無假長笑宇宙間誰是忘形者刈麥思時
暘分苗望時雨彼蒼於農人遷就亦良苦好雨從東來
原田白無牯老穉荷蓑出綠縵紛可覩引耜驟且鳴餘
懼及家牯連歲荒負租頗遭官長怒今幸占有年且願
給公賦絮酒兼炙雞殷勤祝貓虎散步龍山麓石馬高
嶙峋蕪沒野田側行列不復陳不知何代墓感嘆為沾
巾慨昔六代交紫宮架天津虎鬬盡英辟鷹揚皆貴臣
回眸耀白日吐氣貫青昊見者恒辟易况敢托交親詎

知百世下骨肉化飛塵樵牧無人禁姓名亦已湮念此
返田舍秫酒正芳醇傾壺且一醉兀兀忘吾身

陸如崑紫芝亭

彤雲垂靈液瑤邱孕芳根奕奕榮三秀粼粼含五文云
何兆嘉祥允茲昭德門柱史秉貞性忠諫排帝閭雲衢
一失路六翮歛不騫天道往斯復物理輕乃軒盲風鬱
前美慶源開後昆一發產祥麟再發翔文鵷眷言食舊
德為園樹崇勲聊歌瑞芝曲用以喻蘭蓀

贈黃秀才省曾見訪

養痾伏園廬秉耒顧微養藝苑既荒落賓階緬虛曠黃
生大雅流金玉振高響念我來飄遙澄江進吳舫霞裾
汎秋塵羽爵洽朝餉披襟神偕暢析疑道彌廣繼繼淹
旬留契合終古賞臨岐重解攜竚立增惋悵

四皓

高士遺世網一往豈再招飛鴻絕四海弋者徒為勞已
輕高祖業况顧惠儲邀留侯一何詭皓首忽來朝物色

果誰識國本竟不搖歎息紫芝曲空令來者嘲

高司寇盤谷宗祠詩

永嘉闢靈壤茗嶼啟神鑿公孫兆南遊開荒此棲託
蘭蓀日以滋瓜瓞薦綿絡仁人重同本親義懼疎薄
蟬聯大宗祠巨榜照寥廓

崇祠象雲構盤谷緬逶迤巖巒倚櫺檻松梧蔭堦墀
宗祧肅天序烝嘗展時思既覃親睦恩亦慎長少儀
昭昭世家體懿則良可規

金匱要略卷三
司寇國楨幹履道先厥躬繩武念有始貽謀逮無窮族
惠廣晏子祖德述謝公禮容邇既洽義烈遠彌隆唯茲
教家理協彼調元功

息園存稿詩卷三

欽定四庫全書

息園存稿詩卷四

明 顧璘 撰

五言古詩

客居雜言七首

暎暎都城隅流雲泛春陌餘寒散林莽羣芳展佳色
賴此清尊酒慰我遠游客獨酌臨高堂清吟遲華月

客思何悠悠堂深澹孤燭遙情續更漏流光變春服道

拙幸逢時名微恥懷祿青雲有脩程所向貴知足不讀
老氏書何以蠲殆辱

遲陽照東軒淑景媚清曉暖吹蕩輕花晴光悅幽鳥披
衣俯前楹茸茸見新草感時思故鄉懷人傷遠道南望
登高臺長河波浩浩

端居忽成月頗協幽求盟探書仰聖蘊染翰輸芳情開
軒枉儔侶促膝叙平生所樂幸有諧虛名何足營

草生不擇野雨落不選池曠哉天地心含弘本無私楚

弓昧得失魏寶恣夸毗秉心戾大道蓄害良由茲
閉門散書帙覽古復觀心卓彼聖哲徒逢時善升沉在
埜道為土登朝身即霖垂輝照千古耿耿流華音

象弟慕琴觚蓋井入舜宮管蔡騰流言周公安得忠利
害苟相軋骨肉且莫容海深舟可濟山險梯可通梯山
畏天雨濟海憂天風風雨固弗測我行焉不窮願言剷
高深坦坦四域中

夏日觀畫障作二首

端居抱煩鬱赤日懸庭央展圖挂素壁暗爽生虛堂
滴水鳴瀨蕭蕭樹含霜道人多浩思坐閱羣山蒼把筆
念明哲空令毛髮涼

秋容曠千里冉冉入舟墨山靄朝夕雲湖明滿堂色林
聲隱瀟颯崖勢宛傾仄扁舟鼓枻翁圖史昭隱德深衷
諒有在沉冥詎能測

植竹

山人抱沖襟幽居植修竹靈籟間風雨疎陰靜炎燠至

性苟相成浮生澹無欲聊持一樽酒長歌片雲綠

晤言

抱道思避喧結茅在空谷忽枉同心人來共山中宿落
落泉挂巖蕭蕭葉辭木林寒物態減歲晚天氣肅幸有
盈樽酒可以慰幽獨

知山堂雅集二首

嘉會終夕景初星映寒池寂歷山水思聯翩風雅辭清
夜方向永舊懽良未移無為坐乖別忽復懷今茲

晏坐清觴疎苦吟寒爐落幸遠絲竹喧轉羨幽抱廓留
懽就閒軒延望倚虛閣寄謝招隱篇居然得邱壑

有贈

寶劍千黃金相逢託相贈千金良已多誼氣乃足稱匠
石不虛斲子牙輕衆聽鳳凰鳴青梧恥與羣雞應聃爾
抗高風相將謝卑佞

行樂至溪南偶成

抱疴掩荆扉出戶已寒節新晴步南溪草際見殘雪仰

視日光微始驚天氣冽
敝裘有餘溫濁酒堪獨啜
羸軀尚能存暄月會當別

碧溪

落落高梧陰俯瞰寒流
碧微雲過疎雨秋容澹
無迹魚遊綠藻晴鳥下
青蕪夕興至每垂綸歌
罷還岸幘漁父兩三人
時來共爭席

清風

幽居屏羣慮散髮坐虛宇
清風卷帷入偶爾成賓主
歌

諧衆籟鳴醉散長襟舞列仙眇何之神遊越千古

築室

蚤懷嘉遯志築室山之偏室中何所有古書且千篇飛
雲流空淨皎月當戶懸獨覽高士傳遙心兩悠然

贈孫思和

東林一片石綠蘚生秋痕時招葛巾客對坐傾匏尊俯
愛澗下水仰觀枝上猿誰能策羸馬日夕依朱門

燕臺夜贈人

寒宵漏方永華月生高林
道人有幽抱起步東巖陰
悽惻海內事浩蕩平生心
高歌燕臺下曲盡意彌深

古意

青青琅玕葉粲粲黃金花
枝葉相糾結不殊松與蘿
雅操歷霜霰幽意諧巖阿
豈無衆草色不久當奈何

湖上

舟聚湖水渾舟散湖水清
潛鱗畏夜冷浴羽驕冬晴
潮回沙篆合風過波文生
片帆掛暝色乘月中流行
弱艣

泛浪怯長篙觸石驚艱難渡前浦寂寞泊孤城冒險諒
知悔所志功與名何如澤畔漁扁舟寄身輕掄竿踞谿
石長歌對滄溟

春日奉懷邊庭實期游道院

思君昔去遠迢迢千里程見君今且邇我我限嚴城遠
別心尚緩近別苦牽縈弱柳布芳景流鶯變新聲羈栖
獨成感荏苒空含情願攜同心侶共恣中林行行歌踏
瑤草遠眺春烟生

遊道院一首倚前韻

青春客京國王事靡見程佳辰結儔侶覽彼夫容城高
興如遊絲縹緲雲中紫花嶼列棋局松林聽經聲偶然
謝塵鞅亦慰烟霞情俯瞰碧草出仰視白日行乘時不
娛樂偃蹇虛吾生

對燈次金大仁甫

西軒夜深沉燃燈坐相對丹虹卧騰光朱虫聚成輩雨
焰拂藥低風輝裊窗碎燭幽犀角靈投炎蛾腹潰堂深

望轉孤漏永剪還再紅燼墮寒灰蒼烟浮夕靄凌寒氣
彌和待旦心非昧隨君照道亡仁功起殘廢

贈半隱老人

南山秀中野山氣秋逾清雲高碧松偃月冷丹楓明猿
鶴對巢語烟霞遶林生中有綠髮人石上吹玉笙尋丹
勾漏井醉酒維揚城錦鶻飾白馬豪俠類橫行誰知守
雌意默默解天刑

贈吳山人

昔遊洞庭麓，蘿陰覆君堂。
開窗湖水綠，舉酒橙花香。
別來嬰時網，欲濟苦無梁。
東風送君至，烟霞滿衣裳。
冷冷泉石談，洗我塵上腸。
山僧忽已化，階樹今漸長。
歎息浮世事，因之念滄浪。

贈姚山人

我愛震澤水，浮烟陷人寰。
房櫳間草樹，風景如蓬山。
問君果何為，來遊京華間。
賣藥御風出，買書乘月還。
青春忽已暮，石上桃花斑。
相思眇難見，極目高雲間。

不寐

虛堂生夜寒殘燭照孤寢自撫平生心輾轉不安枕浮
雲久彌煩往事靜堪哂立德既已違催科詎能忍悠悠
古循良空令急相軫

發縣東門道

縣職苦煩促出郊始悠然油油野田黍噉噉高枝蟬物
情固匪異客感自增妍新雨夜來霽游雲尚浮天靈曜
隱喬樹清流溢廣川覽茲會佳賞勞役非所牽長恐坐

衰歇戚戚悲華年

東鄭生

圖史聊足娛胡為苦多營經旬謝賓客春草當門生白
髮午未櫛青山時獨行蕭蕭樹上瓢莫與風俱鳴

賦得霞觴壽吳翁

金母釀玄醴日採扶桑霞靈光化浮蟻片片揚榴花神
仙善幻相陰陽注精華酌以美顏色炯如三春葩真氣
固元命令人壽無涯願啟長指爪獻之山翁家

雜言送延平朱使君十三首

京華季冬月雪滿十二街飲馬鑿堅冰王程指天涯雲
鵠下遼海霜鴻渡長淮形影望不極歷亂平生懷

使君金閨彥英氣橫四海鍾懸抱洪音劍動發殊采文
林千秋契宦轍一朝改風江波鱗鱗行舟何處在

北風吹河水晚溜明寒漸舟師理長纜指直不得維感
時抱虛警惜別呈苦辭君今在江湖遺我千里思

燦燦青雲器振藻耀詞場衆中每揮翰吐氣炯虹長縱

橫敵枚宋調笑卑曹王腐儒苦齷齪低眉詎能揚
曉出石城門古道映寒日昔人經此地離別已非一江
迴舊市改水淺新洲出君當樹榮名契濶非所恤

朱輪何煌煌樹羽擁朝俊心將秋水澄氣帶春林潤古
道暎青編來勛倚玄鬢豁達廊廟姿馳驅試侯印

金陵四方會皇都六代陳留懽歌子夜行樂賦陽春遊
軒方結駟離舟忽在津更向攜手地獨憶同心人

殘月照虛牖饑鳥起前林物色豈殊昔今晨傷我心攬

衣出庭戶載酒候城陰贈子涉遠道何以比南金

天馬逐流電善御得其良丈夫負烈氣所貴慎王章羣
黎愛膏澤衆草惡嚴霜赫赫學錦士徒為知者傷

郡城何巍巍畫閣映空起展旗散羣峯化劍餘寒水帶
臘茗舒黃迎秋荔垂紫遙謝列岫篇清吟會當擬

江左金蘭社憐君最英妙平生冰玉心皎皎兩相照銜
羽附孤騫顰額蒙羣笑叨承大賢容誰云本同調

寒江澹無影孤帆穩如停淮南雪初霽遠見羣山青芳

樹集鳥鳥高原飛鵲鷁故鄉本伊邇之子不得寧

紫絲約金勒五馬如錦新雲開海色霽雪盡林芳春寧
惟省殊俗憑軾禮嘉賓寂寂楊子業非君誰見珍

野亭公雜咏六首

野堂

晉公歸綠野開堂近林邱遂掃車馬蹟時招麋鹿遊羣
盜近方息高卧吾何憂白雲宿簷際來自商山頭

野閣

金匱山房詩集 卷四
小閣何亭亭臨郊俯清樾虛棟駐山雲閑窗納林月浮
烟坐來消飛鳥望中滅沖襟寂如水那知有炎熱

野山

誰鏟太髙角置向草野前相看僅尋丈宛若萬仞然清
華發草樹秀色生雲烟下有謝安石閉戶方高眠

野泉

蒼郊雨新過清流泛平池渟泓鑒萬象應物初無私禾
黍漬餘潤萍藻含華滋本來絕機事桔槔爾何施

野圃

植蔬既展甲種豈復引苗主人久不來蔓草忽齊腰微
雨曉初霽園丁載艾穢剪草自剪草慎勿傷良條

野籬

挿竹遶荒畹扶疎亦成藩牛羊絕來往養此幽蘭根芳
菲與衆賞何用高重垣况對南山色可以傾吾樽

宗伯邵公壽藏詩四首

芑山一片石萬古沉荒烟雖留蚪斗字精光暗當年邵

公命世佐埋玉封高阡移爾置道左佳名永相傳

二松何代物挺峙

闕

青冥長風度萬里吹散波濤聲天

意庇明德宛遺衛佳城行人過山麓仰止餘陰清

前山石盤紆後嶺秀不如龜龍奠經緯松栢守門閭邱
中曠以奧結構千載居下置青玉几上覆白雲廬

公昔構齋居泉源益清冽公今作生墓泉溜互環折諸
方仰灌溉萬類鑒澄澈乾坤第二泉彷彿為公設

贈別周別駕王司理入京十四首

湛湛靈江水東注滄溟深不知結交義詎明離別心匣
藏青萍劍囊韜綠綺琴因君罷拂拭緘愁謝知音知音
日以遠離恨方自今

訪古遊天台八極神飄飄笑逢兩仙人把袂申久要饗
我白玉醴侑之紫鸞簫清歡意何極冉冉暮復朝流萍
忽飄散悵望空魂銷

高人難邂逅齷齪徒為衆百鳥漫喧啾何如一孤鳳與
君結兄弟曾次兩空洞咫尺每相見條為千里夢長亭

一杯酒惻惻不忍送

海風吹洪濤高浪遠明滅飛流濺林莽散作巾峯雪青
松抱寒蒼梅花寄愁絕郡齋敲疎帷濁酒正堪啜如何
同心人苦欲話離別

周子觀定海下窺東極深王君誇鴈宕厯遍青瑤岑我
有山水癖聞之熱中襟短屐蠟已屢長筇鐔有音今將
別我去何時共登臨

剖符守東海所職在黔黎才疎寡惠愛莫救饑寒啼多

君美無度三益開我迷常恐膠漆解詎意參商睽君行
樹鴻名余當還故溪

歲華不可留日月去如水蹉跎風塵間奄忽將暮齒大
夫參三才萬物聽網紀時來值嘉會乘雲附龍起公等
非凡才騰踏自茲始

青青陵上栢歲寒無改柯四海為兄弟所貴心靡他管
鮑白頭交蕭朱晚節訛貞心如砥石反覆任風波願因
折麻地載申伐木歌

行行及辰良律轉寒序畢東風來幾時江草忽青出幽
鶯濯輕澌疎梅耀遲日蘭棹從此逝佳興諒非一倘賦
清水篇貽我慰蕭瑟

周瑜擅風雅王粲多文章皎皎冰雪心熒熒金玉相近
愛莫為助遠別令心傷贈君青桂枝物微意徬徨憑誰
報天子並置黃金堂

赤城山水窟勝觀標靈竒鰲峯控東海瞥見扶桑枝窈
窕桃李園慘淡蛟龍池前遊忻共賞後會杳莫期風景

宛如昨默默勞相思

聖皇御六合神武由天開按劍清朔方萬里無飛埃猛
士若虓虎超乘四方來期門賦羽獵正乏相如才行行
入幽冀莫羨燕昭臺

斯人多瘡疣君門嗟萬里先民喻安危即事指舟水銀
章挂君腰承宣職所委奏功赤墀下願言報天子不聞
四郊亂無乃大夫恥

霜風撼庭戶夜坐披貂裘離心似江水宛轉隨君流忍

寒作悲吟一吟四五休此夕復何夕令我成白頭短篇
本非苦長別增煩憂

徐學士子容薜荔園十二首

思樂堂

久家湖山上解攬湖山奇先君嘉遯地堂構開洪基慨
昔未窮樂貽今無盡思傷心夜臺日不照春園枝

水鑑樓

清池若明鏡照見池上樓開簾對秋月影動青孤裘峻

嶺金銀闕毛骨寒疑秋莫教彈劍舞夜久驚潛虬

風竹軒

幽軒繞叢竹四壁風淒清端居不出戶日夕聞秋聲炎暑永難至塵氛何自生翛然覽元化默契千古情

蕉石亭

怪石如筆格上植蕉葉青蒼然太古色得爾增娉婷欲攜一斗墨葉底書黃庭拂拭坐盤薄風雨秋冥冥

觀耕臺

微雨開青春田家事東作早起臨平臺間與僮僕約鞭
牛莫鞭腹束草莫解縛腹潰傷神明草散滋蔓惡

薔薇洞

百丈薔薇枝繚繞成洞房密葉翠帷重穠花紅錦張對
著玉局棋遣此朱夏長香雲落衣袂一月留餘芳

荷池

紅蓮日相鮮白蓮色如故穠華多改移澹泊無外慕衆
人愛顏色君子樂貞素蕩舟方池陰日暮獨延佇

栢屏

壁立青玉屏下見古栢根相憐歲寒葉鬱作蒼雲屯貞
姿洗霜雪老氣橫乾坤名園非此種誰可當君門

留月軒

明月出海底挂向珊瑚枝玉鏡飛不去中夜光離離滿
持洞庭酒長歌謫仙辭西風吹桂影潏灩翻金卮

通冷橋

橫溪斷山麓危梁架雲徑飛雨鳴寒泉泠泠發清聽莊

生濠上遊孫公天台興無勞千里遊即此託相贈

花源

靈源出山遠曲溜通溪斜春風自何來片片浮桃花我
聞林屋巖中隱神仙家遡流一相見共爾希餐霞

釣磯

子陵隱嚴瀨呂望栖磻溪龍潛息雲雨虎變揚虹霓徐
君一片石乃在震澤西功成拂衣去名與二公齊

林廷尉以吉四詠

先菊庵

嘉華耀令節歲寒羨孤芳君子先時降貞素乃含章馥
馥掩蘭芷亭亭凌雪霜嗤彼桃李花徒然驕艷陽

莫庭

鮑魚相與化下流難為居肅肅義方訓永懷猶厥初既
揭座右銘復置懷中書彷彿聆謦欬陟降臨庭除


石厓讀書臺

峨峨崖上臺萬卷此俱積玄聖閱其神幽討悉肝膈吐

之經四方廊廟行旦奭輪扁愚蒙人何足語心迹

瞻紫亭

朝瞻紫峯明暮瞻紫峯晦華表白鶴歸雲端見冠佩天
地無終窮日月互謝代血淚如流泉迸注難自愛



息園存稿詩卷四